

29 MAY 1996

HARI PENGGUNA SEDUNIA 1996 DISAMBUT 4 JUN

KUALA LUMPUR, 29 Mei (Bernama) -- Hari Pengguna Sedunia 1996 peringkat kebangsaan akan disambut pada Selasa ini di Dewan Mukhtamar, Pusat Islam di sini.

Pegawai Perhubungan Awam Kementerian Dalam Negeri dan Hal Ehwal Pengguna Encik Tan Ishak dalam kenyataan hari ini berkata, sambutan Hari Pengguna Sedunia kali ini sekali lagi akan memberi penekanan kepada kempen anti inflasi dengan mengekalkan tema kempen tahun lepas, "Inflasi Sifar Sasaran Kita."

Katanya Perdana Menteri Datuk Seri Dr Mahathir Mohamad akan melancarkan sambutan itu.

Satu tema khas bagi sambutan tahun ini "Berbelanja Dengan Berhemah Untuk Kebahagiaan Keluarga" turut diadakan, bertujuan menanamkan nilai kesederhanaan dan jimat-cermat supaya sesebuah keluarga berpendapatan RM1,500 sebulan atau kurang dapat hidup dengan selesa.

Katanya sambutan Hari Pengguna Sedunia yang diadakan sejak tahun 1990 bertujuan memupuk kesedaran kepenggunaan yang positif di kalangan semua anggota masyarakat dan mewujudkan persefahaman serta kerjasama erat antara pengguna, peniaga, kerajaan dan media massa dalam aspek kepenggunaan.

Pemenang-pemenang anugerah Tokoh Pengguna, Majlis Hal Ehwal Pengguna Yang Paling Aktif, Majlis Hal Ehwal Daerah Yang Paling Aktif, Kelab Pengguna Sekolah Terbaik dan Kedai Harga Patut Terbaik akan diumumkan pada majlis itu. -- BERNAMA

HS OBA